

La Quotidiana digitala

Il concern da medias va en l'offensiva cun la communicaziun digitala

DA MARTIN CABALZAR

■ **En l'avegnir na pon ins betg leger La Quotidiana mo sin pal-piri, mabain er a moda digitala sin in tablet u al telefonin. Cun quest pass fa il concern da medias da la Südostschweiz SA in pass decisiv en la communicaziun digitala.** Tenor *Lukas Joos*, il sviluppader d'interpresa da la «Südostschweiz Medias», vul l'interpresa da medias grischuna tegnair quint cun questa novaziun dal conum da medias che sa chatta en cumplaina evoluziun. Aschia san ins acquistar dapi intgin temp in indrez da tablet che dat access allas gasettas quotidianas «Die Südostschweiz», «Bündner Tagblatt» e La Quotidiana. Da nov porscha l'interpresa grischuna da medias er in app per telefonins/smartphones. Questa applicaziun na lubescha betg mo da leger las gasettas stampadas a moda digitala, mabain era da leger las pli recentas novitads e blogs, tadlar radio e contribuir sco rapportaders e fotografis libers. Lecturas e lecturs chattan sut la rubrica «Zeitung» ils artigels da la front da tut las trais gasettas quotidianas. Novs abbonents u abbonents registrads pon



Leger La Quotidiana senza palpiri: En l'avegnir po LQ era vegnir legida sin tals tablets digitalis. FOTO M HARTMANN

leger lur gassetta preferida gratuitamain en versiun digitala sco E-Paper. En connex cun la convergenza da medias che vul promover ina cooperaziun pli intensiva tranter gasettas, radio e televisiun sut il tetg da la SO porscha igl app cuntegn multimedial. Ins sa tadlar live Radio Grischa e pli

tard era guardar Tele Südostschweiz.

La SO ha gia fatg avant intgin temp il pass en «l'avegnir mobil» cun introducir in app per apparats da tablet sco iPad che funcziunan da princip sco in kiosk. Sin quel finistrel ch'ins po cumprar actualmain per in

pretsch reduci pon ins leger sper las trais gasettas quotidianas era las 9 gasettas localas che vegnan edidas da la Südostschweiz Medias. Per abbonents d'ina gassetta è la lectura da lur gassetta abunada gratuita.